

Wer eigen Hütten / oder teyl an Hütten hat / der sol inn seiner  
eigen / noch andern Hütten / zu keinem Hüttenreiber gebraucht  
noch geduldet werden.

Die Hüttenreiber / sollen an ihren gesetzten lohn begnügig  
sein / darüber niemands beschweren / von den Hütten nutzungen /  
vnd von den Gewercken / so darinnen schmelzen / Eynen genieß  
haben / noch gewarten.

Sie sollen auch nicht Schichtmeister mit sein / sondern sich an  
ihrem Hüttenreiber lohn allein begnügen lassen.

Die Hüttenreiber sollen darob sein / das die Hütten alweg /  
mit Kohlen / Pley / Schlacken / Stain / Flößen vñ andern zusetzen  
geschickt sein / Damit die Gewercken vnd deren Vorsteher solches  
zu der notturfft / alweg bekubmen mügen / den sie auch solche stück  
auff's nechste / an auffsatz lassen sollen.

Ein ieder Hüttenreiber / sol alle mal bey dem Schmelzen /  
sonderlich aber bey dem anlassen sein / Vnd alle augüsse / vnd ver-  
such schichten selbst probirn / auff das die Schmelzer ihrer öfen  
vnd Arbeit warten mügen / Vnd so man schicht machet mit vleis  
zusehen / Damit alle zeit getrewlich vnd wol gehandelt werde.

Es sol auch ein ieder Hüttenreiber / alles Pley das er von  
dem Pleyhandler / oder ihrem Factor / annimpt / vñnd ein jede post  
sonderlich in der Wag / so darzu bestellt vnd angericht ist / durch den  
verordenten Wagmeister gewogen / vnd mit des Kads zaichen / ver-  
merckt / alles in persönlicher gegenwart / vnd gar keines vngewogen  
vnd an des Kads zaichen / annehmen / dasselb fürder den Schicht-  
meistern nach rechtem gewicht / zustellen / vnd von einem Centner  
ein Elain pfennig zuwegen geben.

Die Hüttenreiber sollen in sonderheit / mit probirn der werck  
alle stich vnd schichten vleis thun / vñnd nicht so reichlich / sondern  
auff das genawest vnd scherffste probirn / damit vnuerdechtig / vnd  
den Gewercken nicht zuschaden gehandelt werde.

Sie sollen darob sein / das die Wage vnd gewichte in Hütten /  
sonderlich wenn man der gebrauchen wil / rechtschaffen auch sau-  
ber vnd rain seind / vñnd das die Schmelzer vnd Fürlauffer / das  
werck mit allem vleis wegen / dabey die Hüttenreiber selbst sein  
sollen.

Es sollen